

FJALA E DEPUTETIT TOMOR ALIZOTI

E HËNË 23 MAJ 2022

Zoti Kryeministër, meqë ju përmendët Xhelal Koprenckën, Xhelal Koprencka ishte një mik i ngushtë i timi. Unë në moshë të vogël, fatkeqësisht, nuk e doja këtë bisedë dhe zakonisht në këtë temë unë hesht, nuk para flas shumë, nuk flas veç nga vendi. Unë në moshë të vogël shkoja shpesh në Spaç, edhe në Qafë Bari. Para disa ditësh ose pardje më saktë, shkuam për përkujtimoren e Tom Ndojës dhe Sandër Sokolit, por kam përshtypjen që, fatkeqësisht, në këtë vend padrejtësia ka zënë vend.

Njerëzit që ishin pjesë e elitës, fatkeqësisht të komunizmit, sot marrin në dorë të bëjnë edhe drejtësinë ose të flasin edhe për antikomunizmin. Kur unë jetoja në kasolle dhe shumë të persekutuar politikë nuk shikonin prindërit e tyre, ju ishit në mes të Tiranës. Jo se keni faj për këtë gjë, por të paktën ruani botën e artit dhe batutën tuaj, që të mos hyni në një fushë të minuar, kur edhe ju vetë, familjarisht, jeni i përfshirë në këtë pjesë. Aty kanë qenë fisnikë dhe heronj, siç e tha zotëria, të cilët Shqipëria duhet t'i respektonte, Pal Sokolin, Xhelal Koprenckën, që ishin fisnikë. Dhe për ju, po të mos ishte Partia e Punës, që e përmendni shumë, më vjen keq që jua them, ti dhe Olsi, do të shpërndanit çadra në Dhërmi dhe Vuno, sepse ju vinit nga ajo shtresë, ju ishit klasa punëtore.

Fatkeqësisht, ne aristokracinë na e vranë njerëzit tuaj, por ju të paktën, për respekt dhe për zotëriallëk, për dy fisnikë që sfiduan diktaturën, kur 90% juaja bërthimëse "Parti-Enver", duhet t'i nderonit. Sepse kjo parti e majtë, që është pronë kombëtare, duhet të bëhet liberale e majtë, të paktën duhet të shkëputet nga krimet e komunizmit, si dhe duhet të shkëputet edhe arroganca juaj. Jeni shumë arrogantë, ndonjëherë, më falni, jeni edhe injorantë, këto kombinohen. Këtë etikë që përdorni, gjoja sikur bëni humor, e bëni sepse jeni sipërfaqësor.

Unë ju falënderoj dhe shpresoj të reflektoni, zoti Kryeministër! Dhe refuzoj t'ju dëgjoj, kështu që do të iki të pi një kafe për qejfin tim.